

16. oktober 2019

UKA 2019/138

Kinguaassiuutitigut meeqjanik atornerluisoqarsimatillugu pineqaatissiarnerup sakkortusinissaanik Nunatsinni unnerluussisussaatitaasut kaammattorneqarnissaat siunertaralugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq, Sofie Geisler, Inuit Ataqatigiit)

Kinguaassiuutitigut meeqjanik atornerluisoqarsimatillugu pineqaatissiarnerup sakkortusinissaanik Nunatsinni unnerluussisussaatitaasut kaammattorneqarnissaat siunertaralugu Naalagaaffeqatigiinnermi oqartussaasut saaffigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut Sofie Geisler Inuit Ataqatigiinneersup siunnersuuta Siumumumiit ima oqaaseqarfingissavarput.

Nunatsinni kinguaassiuutitigut atornerluisarnerit amerlasoorujussuunnerannut oqariartuutaasartut misissuinerit assigiinngitsut takutittaraat Siumumi ajuusaarnartutut isumaqarfigaarput. Taakkualu atornerluinerit pisartut iluanni meeqqat kinguaassiuutitigut atornerlunneqartarnerat aamma annertuujusoq takussutissartaqarpoq – tamannalu annernarluinnaqqissaarpoq immikkullu akiorniagassatut iliuuseqarfingineqartariaqartutut Siumumi isumaqarfigaarput.

Ukiopassuanngortuni pinaveersaartitsineq annertooq inuiaqatigiinni ingerlassimalgularlutigu kinguaassiuutitigut atornerluinerit ataatsimut katikkaanni malunnaatilimmik appariaateqarneq ajornerat assorsuaq uggornartuuvoq, akiuiniarnermimi inuppassuit nukippasuillu atorneqartarput ilaatigut soorunami iluatsitsiffiusartumik. Pinaveersaartitsinernilu taakkunani nikalluaallutik suliaqartut suliaqartarsimasullu Siumumiit qamannga pisumik qutsavigumavagut.

Maannamut pineqaatisseeriaaseq qiviaraanni kukkuneruallaasanngilaq oqarutta pinerluuteqarsimasoq pinerlineqarsimmasorlu piffissap siviktsuunnaap qaangiunnerani nunaqarfimminni illoqarfimminniluunniit inooqatigeeqqilersarmata. Tamanna soorunami toqqisisimanartuunngilaq, aammalu pinerluuteqartoqaaqqinnginnissaa kiisalu toqqisisimasumik inooqqilertoqarnissaa qulakkeerumallugit iliuusissat annertusarneqartariaqarnerannik pisussaaffiliippit.

Ajornartorsiutip akiorniarnerani politikkikket iliuusaasut Siumumiit pitsaasutut isumaqarfigaarput, tassami kinguaassiuutitigut atornerluisarnerup akiorniarneqarnerani maannamut inatsisitigut sukaterinerit arlallit ingerlanneqarsimalerput, taakkualu soorunami kinguneqarluartitsisimanissaat Siumumiit naatsorsuutigilluinnarpagut. Taamatullu aamma tapersersuinerup katsorsaanerullu nukittorsarneqartuarnissaannik iliuuseqartuarnerit kinguneqarluarumaartuttaaq Siumumi neriutigilluinnarpagut.

Siunnersuuteqartup ujartugaa, tassalu kinguaassiutitigut meeqqanik atornerluisoqarsimatillugu pineqaatissiinerup sakkortusineqarsinnaaneranik ujartuinera Naalakkersuisut ilaleraat kiisalu suliap aallartereersimaneragaat Siumumiit ilassilluarparput, taamaammallu siunnersuutip massumap Naalakkersuisut sulinerannut ilanngullugu suliassatut pingaaruteqartutut ilanngunneqarnissaa Siumumiit pissusissamisoortutut isumaqarfigaarpot.

Maannamut nunatsinni pineqaatisseeriaaseq qissimigaaraanni pinerluuteqartut inuttut atugaat annertuitigut sunniuteqartarpot, tamannali periuseq suli naappertuunnersoq nalilorsorluagassaavoq pillaasarnermut sanilliullugu.

Naggataatigut Siumumiit meeqqanut kinguaassiutitigut atornerluisarnerit akiorniarneqarneranni suleqataanissarput suleqataajuarnissarpullu oqariartutigerusupparput, iliuusaasinnaasullu pitsasut kinguneqarluartussallu tamaasa atorlugit iliuuseqartariaqarluta.

Taamatut oqaaseqarluta aalajangiiffigisassatut siunnersuut manna ataatsimiititaliami susassaqartumi suliarineqarnissaa inassutigaarpot.

Anders Olsen, Siumut.